

Il crot e la principesse

Seont Miriam Pupini

Al jere par antîc un re che al veve une fie tant, tant biele.
In chê dì e finive i agns e lui i fe un biel regâl: une balute di aur.

La principesse contente par chê sorprese no pierdè timp a lâ a zuiâ intal zardin.

Zuie che ti zuie la bale e le a colâ dentri il poç .
La puarine e tacâ a vaî displasude: " Oh la mê balute di aur colade intal poç cumò no podarai plui zuiâ. Oh puare me."

Di li a pôc al vignî fûr dal poç un crot che i domandà: " Parcè vaistu frutine biele?"
" O ai pierdude la mê balute di aur. E je colade li tal poç" i rispuindè pronte seneose di jessi judade.
" Puedistu cjatâle par me?" e continuà.
"Se te cjati ce mi dâstu?" I domandà chel.
"La mê corone e ducj i miei zugatui" disè la principesse.
"No, no, no vuei la tô corone e nancje i tiei zugatui...o vuei podê diventâ to amî...e po dopo mangjâ tal to platut, bevi inte tô taçute, doprâ la tô sedonute....e durmî intal to jetut" i elencà il crot.
"Po no, no" i vosà la frutine un pôc stralunade.
"Inalore nuie di fâ " i berghelà daûr il crot.

Viodint che al tornave tal poç, la principesse ae fin si rassegnà e i prometè di dai ce che al voleve: diventâ amîs, mangjâ tal so platut, bevi inte sô taçute, doprâ la sô sedonute, durmî tal sô jetut...

Il crot dut content cui voi plens di gjonde e il cûr sglonf di amôr par chê biele frutine, che par tant timp al veve voglonât biel che zuiave tal zardin, i dè la balute di aur.

Po al petà un salt fûr dal poç e i le daûr.

Ma chê fasint une corse e rivà prin di lui al Cjiscjel e lu sierà di fûr.

"Vierç, vierç" al zigave il crot" tu mi vevis prometût di jessi mê amie".

Ma la principesse no lu stave a scoltâ. Inalore lui al tacà a vosâ fuart tant che il re, sintint chel davoî al vignî fûr a viodi.

"Ce aial chel crot di zigâ tant?" Al domandà.

Inalore la principesse i contà dute la storie.

"Une promesse e je une promesse e va mantignude " dissal il re.

La frutine a cjâf bas e scoltà il pai e cul marum in bocje e le a vierzi la puarte al crot.

Ah, chel nol spietave altri. Cun cuatri salts si cjatà za sintât ae taule, cu la sedon plene di mignestre si jemplà la bocje e po ben passût al bevè te taçute de principesse che lu cjalave un pôc ingomeade.

"Bon, cumò o podìn lâ ancje a durmî " dissal il crot cun bocje di ridi. La frutine però no jere di acuardi e e provà a lassâlu indaûr, ma il re so pari i cridà . Si sa, une promesse e va mantignude.

Mal vultîr e le sot de plete e cun je ancje il crot. Ma lis robis no lerin par nuie ben: tire di ca, sburte di là, no rivarin a cjapâ sium. A un ciert moment la principesse si stufà di chel crot e rabiade e cirì di butâlu fûr dal jet. Ma chel al tignì bot.

La frutine no lu sopuartave plui e cjolte la scove i dè jù uns cuatri pachis tant par spaurîlu... Ma poche ca e poche là, salacor i dè jù masse fuart e chel puaret a un ciert pont no si movè plui.

A chel pont, displasude di vêlu petât malementri i domandà perdon:" Oh crot, no volevi fâti cussì mâl" e sgnaolave, ma chel no si moveve.

Cul baticûr i le plui dongje e cuntune vosute zentîl e zontà: " Oh crotut, scuse, scuse.... spiete che ti doi une bussadute che ti passe la pacute..."

Intun lamp chel che al jere un crot al diventà un biel fantaçut."Orpo ce striament isal mai chest ca?" e disè spalancant i siei voglons.

Il biel fantat cjalantle cun tenarece i contà pront:" Un striament par da bon, che dome la zentilece di une principesse e podè fâ finî!"

"Oh soi propit contente di jessi stade propit jo! Cumò sì che o podin jessi amîs, anin a dîlu al gno papà il re".

I doi, cun grande emozion, i contarin dute la storie e il re al scoltà atent.

In fin il biel fantat, che al jere un vîr princip, cun biele maniere al finì il discors disint : "O soi cussì innamorât de biele principesse che no pues vivi cence di je e inalore, siôr re, o ti domandi di podê sposâle ".

E il re viodint la gjonde tai voi de sô frutine, par chê domande, nol podè fâ altri che jessi content di dâje in nuvice.

E la storie e finì cuntune grande fieste, cun tantis robis buinis di mangjâ e a me, che o jeri sot la taule, dome un vues ca te schene che ancjemò si remene!